

VIII.

SPONSUS RESPONDIT:

- ‘Quam criminose me, soror, arguis!
 Quo tendit ista increpitatio?
 Cur esse te dicis relictam?
 Coniugiine fidem reliqui?
 5 Non permovebor, sed patiar libens
 Te disputantem. Stemus enim simul;
 Ut iudicemur, stemus, inquam.
 Iam tibi iudicio reponam.
 Nunc ergo narra, siquid habes. Ubi,
 10 Quando, vel in qua re tibi defui?
 Nam questa contra me videris,
 Quod sedeas quasi derelicta’.

IX.

SPONSA RESPONDIT:

- ‘Si nunc placerem taliter, ut prius,
 De Libano quando me vocaveras,
 Felicius starem, nec esset
 Fracta mei capitis corona¹,
 5 Turrimque David² nemo refringeret.
 Pugnante quovis de foris, ex ea
 Penderet armatura fortis,
 Unde revincere posset hostes.
 Nunc hostis antiquus ruit a mari,
 10 Septemque victor collibus imperat³;
 Pugnavit, et magno molari⁴
 Perculit hoc caput ecce! fractum.
 Nonne vides, ut nunc sedeat⁵ Symon
 Nerone fretus rege simillimo?
 15 Qui cornibus finguntur agni,
 Sed faciunt veluti dracones.
 Ipsi fugaverunt⁶ vigiles bonos,
 Qui civitatem protegerent tuam.
 Pseudoprophetas subrogavere⁷,
 20 Omne sacrum pretio trahentes.
 Summus sacerdos, crimina persequens,
 Aususque morbum pungere regium,
 De sede Romana fugatus
 Est, et in exilio sepultus⁸.

1) Thren. 5, 16 ‘Cecidit corona capitis nostri’. 2) Cantic. 4, 4
 ‘Sicut turris David’. 3) d. i. Romae. 4) Apoc. 18, 21 ‘lapidem quasi
 molarem magnum’. 5) ‘sedeas’ cod. 6) ‘fugarunt’ cod. 7) Lies
 ‘subrogarunt’. W. 8) Gregorius VII. in Salerno.